



Pistill sveitarstjóra



Kæru íbúar og aðrir lesendur Áveitunnar.

Þegar síðasti pistill var skrifaður var fjölskyldu- og menningarhátíðin Fjör í Flóa að bresta á.

Fjör í Flóa

Hátíðin fór fram dagana 2.-3. júní síðastliðinn og tókst vel í alla staði. Viðburðir voru vel sóttir og sama á við um opnu húsin sem haldin voru víða um sveitarfélagið. Gestir brostu út að eyrum og nutu þess að hitta aðra og eiga saman góðar stundir. Gríðarlega góð þátttaka var í fjölskyldugöngunni meðfram bökkum Hvítár ofan Langholts og Hallanda. Veðrið lék við okkur

og þeir sem þangað mættu nutu útiveru og hreyfingar í fallegu umhverfi. Agnes Harpa og Agnes Björg frá Langholti leiddu gönguna og fluttu ýmsan fróðleik um svæðið um leið. Berglind Björk og Davíð Ingi á Ármótsflöt buðu svo gestum í opið hús eftir gönguna og buðu upp á hressingu. Ég þakka þeim öllum hér með kærlega fyrir sitt framlag.

Dagskráin á laugardeginum hófst á jóga í Félagslundi en þangað mættu þónokkrir og byrjuðu daginn með góðri heilsuefningu fyrir líkama og sál sem var gott veganesti inn í þá dagskrá sem fram fór á laugardeginum. Vel gekk hjá kvenfélögunum að selja girnilegar kökur og kræsingar og vöfflurnar ruku út. Ungmennafélagið Þjótandi stóð fyrir fjölbreyttri dagskrá og var metþátttaka í kökuskreytingakeppninni. Hjólarallý var nýtt á dagskrá og var einnig góð þátttaka í því og mjög gaman að fylgjast með þátttakendum á öllum aldri þeysast um á hjólunum. Pylsusalan gekk vel og krakkar nýttu sér andlitsmálun og settu þannig enn líflegri lit á samkomuna. Trúðurinn Wally mætti í Þingborg og skemmti fólki á öllum aldri með sínum trúðslátum, söngkonan Fríða Hansen mætti einnig og söng sig inn í hug og hjörtu viðstaddra. Sölubásar, málverkasýningar, leiktæki, vélasýningar og annað sem fyrir augu bar tókst vel á heildina litið. Tónlistarveislan á laugardagskvöldinu og grillsmakkið tókst líka vel þó að vissulega hefði verið gaman að sjá fleiri mæta þangað. Það voru SS og Hestafl verktakar ehf. sem gáfu kjöt í grillsmakkið í ár.



Á bakvið hátíð sem þessa liggja margar vinnustundir þeirra sem að undirbúningnum koma. Fulltrúar í Íþróttá- æskulýðs- og menningarnefnd Flóahrepps eiga stórt hrós og þakklæti skilið fyrir óeigingjarna vinnu við að móta skemmtilega dagskrá fyrir okkur hin. Fólkið okkar í ungmennafélaginu og kvenfélögunum vinnur ómetanlegt starf fyrir samfélagið okkar og eiga risastóran þátt í hátíðinni og því samfélagi sem við búum í hér í Flóahreppi. Allir sem opnuðu hús sín og fyrirtæki fyrir íbúum og öðrum gestum eiga líka þakkir skildar fyrir sitt framlag. Og svo síðast en ekki síst allir þeir gestir sem lögðu leið sína á viðburði og í Flóahrepp til að taka þátt, án ykkar verður svona hátíð ekki að veruleika.



Íþróttafólk ársins 2022

Á Fjöri í Flóa voru veitt verðlaun fyrir íþróttafólk Flóahrepps fyrir árið 2022. Í ár hlaut skólahreystilið Flóaskóla verðlaunin en það eru þau Auðunn Ingi Davíðsson, Hanna Dóra Höskuldsdóttir, Viðar Hrafn Victorsson og Þórunn Ólafsdóttir. Þau sýndu það og sönnuðu að góðum árangri er hægt að ná þrátt fyrir að koma ekki úr stærsta skólanum. Það er metnaðurinn, dugnaðurinn, áhuginn og þrautseigjan sem skilar árangri. Við erum öll gríðarlega stolt og ánægð með unga fólkið okkar sem á framtíðina fyrir sér. Að sýna dugnað og þrautseigju mun skila þeim árangri í lífinu. Innilega til hamingju með kjörið.

Hreinsunaráttak og fegrun umhverfis

Sveitarfélagið stóð fyrir opinni viku á gámasvæðinu okkar í Hrismýri dagana 27. maí – 3. júní. Íbúar nýttu vikuna vel og töluvert magn af ýmiskonar úrgangi skilaði sér inn á svæðið þessa daga. Íslenska gámafélagið tekur saman upplýsingar um magn og tegund úrgangs sem skilaði sér þessa viku og verður áhugavert að sjá þær upplýsingar.

Lóðarleiguhafar á iðnaðarsvæðinu í Heiðargerði hafa nú fengið skrifleg tilmæli frá sveitarfélaginu um að bæta umgengni á svæðinu, sem er í sumum tilfellum ábótavant. Einhver tiltekt er nú þegar hafin þar og bindum við vonir við að lóðarleiguhafar bregðist skjótt við þeim tilmælum að gera umbætur í þessum málum.

Hátíðarhöld á 17. júní

Haldið var að mestu í fastar hefðir í Flóahreppi á þjóðhátíðardaginn. Sú nýbreytni var þó að sveitarstjóri keyrði út veglegar morgunverðarkörfur, í boði sveitarfélagsins, til allra íbúa sem eru 90 ára og eldri í sveitarfélaginu. Heimsóknirnar voru gefandi og skemmtilegar og frábært að fá tækifæri til að hitta elstu íbúana okkar. Alls eru 7 íbúar í Flóahreppi sem hafa náð 90 árum þegar þetta er skrifað.

Hátíðardagskrá, fótboltakeppni og leikir voru í Einbúa, útivistarsvæði ungmennafélagsins Þjótanda. Veðrið lék við gesti og hjálpaði það mikið til við að mynda léttu og þægilega stemmningu. Svæðið í Einbúa er einstaklega fallegt og skemmtilegt og hvet ég íbúa til að nýta sér það til útivistar. Ávarp fjallkonu var á sínum stað en í ár var það Kristín Lilja Sigurjónsdóttir í Egilsstaðakoti sem flutti ljóðið Flóavísur eftir Gísla Halldórsson. Halla Kjartansdóttir í Ölvisholti flutti ræðu nýstúdentu en hún lauk námi í múraraiðn á dögnum. Hafdís Gígja í Uppsölum flutti nokkur lög og brekkan tók undir.

Fréttir og myndir frá 17. júní má finna á heimasíðu Flóahrepps.





Umhverfisverðlaun Flóahrepps fyrir árið 2023 voru veitt á hátíðarhöldum í Einbúa. Í ár voru verðlaun veitt fyrir heimili og fyrirtæki. Hjónin Sigurður og Bjarnheiður á Neistastöðum 1 hlutu verðlaun fyrir heimili og Hurðarbaksbúið ehf. hlaut verðlaun í flokki fyrirtækja og tóku hjónin Fanney og Reynir á móti verðlaununum. Í verðlaun var viðurkenningarskjal frá sveitarfélaginu ásamt fallegum úlfareyni frá gróðrastöðinni Kjarri í Ölfusi. Að auki

verður sett upp merki við bæi verðlaunahafa.

Vinnuskóli Flóahrepps sumarið 2023

Gengið var frá ráðningu flokkstjóra í byrjun júní og eru það Árni Geir og Guðmunda Bríet sem taka að sér flokkstjórn í sumar. Árni Geir er yfirflokkstjóri og sér um skipulag vinnunnar. Alls eru 29 unglingar skráðir í vinnu hjá okkur í sumar. Í júní hafa þau unnið hin ýmsu störf svo sem við aðstoð á leikjanámskeiði Þjótanda, aðstoðarmenn í Krakkaborg og svo við umhirðu og fegurð umhverfisins. Starfstími unglinganna nær fram í síðari hluta júlímánaðar.

Hin ýmsu verkefni sveitarstjóra

Verkefni sveitarstjóra eru fjölbreytt. Í liðnum mánuði hefur verið gengið frá ýmsum samningum svo sem vegna refaveiða og grenjavinnslu og samningum við skólabílstjóra vegna skólaaksturs. Auglýst var eftir aðila til að sinna smölun á ágangsfé í sveitarfélaginu og í undirbúningi er að senda bréf á sauðfjáreigendur með kynningu á gildandi fjallskilasamþykkt. Gengið hefur verið frá ráðningu á flokkstjórum vinnuskólans og vinnuskólanum komið af stað og sumarafleysing í félagsheimilunum hefur verið leyst ákveðna daga í júlí-ágúst.

Sveitarstjóri hefur sótt fundi vegna loftslagsstefnu, samráðsfundi með Vegagerð vegna vegtenginga og lagna vegna nýrrar Ölfusárbrúar og fundað með Markaðsstofu Suðurlands vegna málefna sveitarfélagsins. Sveitarstjóri situr í stjórn Fræðslunets Suðurlands og í Almannaþingarnefnd Árnassýslu og voru haldnir stjórnarfundir þar í mánuðinum. Aukaaðalfundur Bergisans bs. var sóttur ásamt aðalfundi Eignarhaldsfélags Suðurlands ásamt áhugaverðum samráðfundi um landsáætlun í málefnum fatlaðs fólks. Framkvæmdir við Urriðafoss hafa verið teknar út og lokaskýrsla vegna þeirra framkvæmda hefur verið send á Framkvæmdasjóð ferðamannastaða.



Stjórn Sambands íslenskra sveitarfélaga kom í heimsókn í Flóahrepp á dögunum og tók sveitarstjóri á móti hópnum og sagði þeim aðeins frá sveitarfélaginu og fór með þeim í nokkrar heimsóknir.

Undirbúningur og úrvinnsla sveitarstjórnarfunda þarf sinn tíma í hverjum mánuði og fjölmörg mál sem snúa að skipulags-, bygginga- og leyfismálum koma inn á borð sveitarstjóra.

Samskipti við Vegagerð vegna samgöngumála og viðhaldsþarfar í sveitarfélaginu er fastur liður og þar þurfum

við að halda áfram að þrýsta á meira fjármagn frá ríkinu til að vegasamgöngur hér í sveitarfélaginu færast nær nútímanum.



Þó að fundir og úrvinnsla mála sem koma inn á borð sveitarstjóra alla daga taki mikinn tíma þá er það að mínu mati einn mikilvægasti og skemmtilegasti þáttur starfsins að taka á móti íbúum og símtölum eða erindum frá íbúum. Að fá að heyra skoðanir og sjónarmið íbúanna skiptir miklu máli til að móta það samfélag sem við viljum búa í. Nú er brátt ár frá því undirrituð tók við starfi sveitarstjóra og hefur þetta ár verið annasamt og lærdómsríkt. Framundan eru mörg skemmtileg verkefni sem verður gaman að takast á við í samvinnu við íbúa sveitarfélagsins.

Sumarlokun skrifstofu

Á fundi sveitarstjórnar þann 6. júní var samþykkt að sumarlokun skrifstofu í Þingborg verði eftirfarandi sumarið 2023:

10. júlí – 21. júlí: Skrifstofa lokuð vegna sumarleyfa.

24. júlí – 27. júlí: **Skrifstofa opin frá 9:00-13:00.** Lokað eftir kl. 13:00 vegna sumarleyfa.

28. júlí – 7. ágúst: Skrifstofa lokuð vegna sumarleyfa.

Hefðbundin opnun skrifstofu verður frá og með þriðjudeginum 8. ágúst.

Minnt er á vaktsíma vatnsveitu: 862-6848

Opnunartímar gámasvæðisins í Hrísmýri eru eftirfarandi:

Mánudaga – föstudaga: 13:00-17:00

Laugardaga: 13:00 – 16:00

Þjónusta á starfsstöð er eftirfarandi: almennt sorp, grófur úrgangur, hreint og litað timbur, pappi og pappír, plast, járn og málmar, spilliefni og steinefni.

Hafi íbúar áhuga á að panta til sín gáma á eigin vegum þá er hægt að hafa samband við ÍGF í síma 482-3371 eða á netfangið igf@igf.is

Næsti fundur sveitarstjórnar:

Næsti fundur sveitarstjórnar Flóahrepps verður þriðjudaginn 4. júlí kl. 9:00 Þingborg.

Hulda Kristjánsdóttir, sveitarstjóri